



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym




tir yimym

TAPAK 7

Cincinnati Masters: Alcaraz, Nardi,
Karen nungeri takok angu

India nem ozü meyong tzüjang kata
magütsütsü: Pakistan PM



VOL. XXII ISSUE NO. 300 (ADOK 300)

DIMAPUR

YANGTEPNÜ (THURSDAY)

LUROI (AUGUST) 14, 2025

₹ 5.00

Sorkari Hornbill benjongmungatema renemba asadanger



Dimapur, Luroi/August 13 (TYO): Nagaland Chief Secretary, Sentiyanger Imchen, IAS mendenpuba sür August 13, 2025 nü Secretariat Conference Hall, Nagaland Civil Secretariat, Kohima nung sendaktepa aliba departments ajunga den senden ka mena liasü.

Hornbill Festival 2025 renemshiba asadangtsü asoshi iba senden ya ayongzüka liasü.

Senden nung Chief Secretary ajanga iba benjongmung asoshi jelia terenemshiba tenzüksü tongtipang lir ta ashi aser tajungtiba nung amalitep akatsü

asoshi subcommittees tentettsüla ta ashi.

Paisa sendaktepa aliba departments tem dang August 25, 2025 nü taruba senden amendang action plans aser proposals tejangja renema bener arutsü ayongzüka liasü.

Iba senden nungsa lenmang, mürekmejuba, transportation, electricity aser logistics dak sendakba tebilemtsü balala indanga jembia liasü. Department balalai iba senden nung parnok indang action plans aser mapa inyaka aoba indang lemsatepa liasü.

Sorkar sentong nung shilem magitsü Ao Senden & AKM-i sangdonger

Dimapur, Luroi/August 13 (TYO): Nagaland Reservation Policy ken o koba kin 5 - Angami, Ao, Lotha, Rengma aser Sumi - lungjemer tanü aser tarutsü lanurtem asoshi noktaker, ya kanga tongtipang lir. Reservation Review Commission nung ochi telemtetba sademsadema agitsü asoshi High Powered Commission nung lokti tentet shinga mamshitsü asoshi sorkar dang ashiba mangai sorkari lokti tentet- Eastern Nagaland Peoples' Organization (ENPO), Central Nagaland Tribes Council (CNTC) aser Tenyimia Union Nagaland (TUN) amshibaji kin 5-i magizüker. Iba yongji sorkar sentong aser senden kecha nunga kin 5 sanger shilem magitsü lemteta aliba ama Sorkar nungi lemtet tajung ka magütsüra Luroi (August) 15, 2025 Independence Day anogo Sorkar sentong agiba tesemtem nung Sorkar mapa inyaker, GBs, NCC, Bharat Scout & Guides dak alaka kin 5 sanger shingai shilem magitsü metetdaksür, ta Ao Senden ajanga sangdong ka nung ashi.

Iba anogo Sorkar sentong aliba tesemtem nung

shishilempaba, kenten-menü, asaya aser sentong balala nung kin 5 sanger nungi Schools, Colleges, kaketshirtem aser lokti tentet balala nungi shinga-ia shilem agitsü memelar. Kari tashi mangai shilem agira pei jurila khuret asütsü, ta Ao Senden sangdong ajanga ashi.

5 Tribes Committee on Review of Reservation Policy (CoRRP) ajanga August 9, 2025 nü pangzüng renemba ama kin pongu tribal bodies temi August 15 nü Indian Independence Day sentong densema State sorkar sentong kecha nunga shilem magitsü pangjemogo.

Anungji tzükong trok kaketshir aser Sub-Ordinate bodies ajunga dang iba sentong nung madentsü mesüra shilem magitsü aser kaketshir/kaket reju kata sorkar sentong nung shilem magidaksütsü asoshi meita repringtsü metetdaksür, ta Ao Kaketshir Mungdang (AKM) sangdong ka ajanga ashi.

5 Tribes CoRRP ajanga akhangba nung State sorkari telemtetba tajung magitetba ajanga iba mera ya agitsüsa akumer, ta sangdong ajanga ashi.

CANSSEA-i CS tasenba nem tenüngsang agütsü

Dimapur, Luroi/August 13 (TYO): Confederation of All Nagaland State Services Employee's Association (CANSSEA) tir Zubemo Lotha Tsanglao-i anir züngsemtemi Nagaland Chief Secretary tasenba Sentiyanger Imchen IAS den August 13 nü pa indang office nung ajurutepogo.

Senden nung tir aser par team-i, Nagaland Chief

Secretary mapa agizükba atema Imchen nem tenüngsang agütsü, aser pa tenure takokma nung tajangzüka ka-a aotsü atema imlaja ataba sorkar tenzükeritem ajak tenüng nung lemsatepa liasü.

Maneni association-isa, pa lenisüba nung state nung employee tem tejangraba ataloka aotsü asoshi jenjang tapet agitsü ta temulung lema bilemba lemsatepa liasü.

79th Independence Day nung Dept. ajak adentsü metetdaksür

Dimapur, Luroi/August 13 (TYO): Nagaland Secretariat Complex temeket mesüra anasa aliba department tem indang ketdangsür aser staff ajunga Civil Secretariat Plaza nung August 15, 2025 anepdang 9:00 ako nungi tenzüka agitsü aliba Independence Day benjongmung nung adentsü metetdaksür, aser iba indang attendance sheet ya nüngdakba mera agitsü atema Home Department nem agütsütsü, ta Home Commissioner, Anoop Khinchi, IAS ajanga sangdong ka nung metetdaksü.

Yangji department item ya alitsü - DUDA, Economics & Statistics, Health & Family Welfare, Higher Education,

Technical Education, Information & Public Relations, Land Resource, PHED, Rural Development, Sericulture, Social Welfare, Treasuries & Accounts, Urban Development, Veterinary & Animal Husbandry, New & Renewable Energy, Municipal Affairs, Information & Technology, Science & Technology, Horticulture, Home Guards & Civil Defence, Agriculture, Motor Vehicles, Labour, Fire & Emergency, SIRD, IDAN, NEPED, GIS aser NSDMA.

Maneni Deputy Commissioners (DCs) ajunga dang pei jurisdiction kübok aliba departments ajunga indang

ketdangsür aser staff ajak dang August 15, 2025 nü Independence Day benjongmung nung adentsü totuyuba agüjang ta metetdaksür, ta sangdong ajanga ashi.

Nüngdakba mera agitsü atema Home Department nem agütsütsü asoshi Deputy Commissioner nem attendance sheet agütsütsüla.

Iba sentong nung adenba staff tem indang attendance agitsü asoshi Head of Departments ajungai nüngdakba mera agia anepalutsü aser iba attendance sheet ya Home Commissioner, Nagaland indang office nem agütsütsü metetdaksür, ta sangdong ajangasa ashi.

CPO-i backward tribes tejangraba kumzüka ayutsü ayongzüker

Dimapur, Luroi/August 13 (TYO): Reservation Review Commission (RRC) ka tentettsü asoshi Nagaland sorkari telemtetba agiba pelashishia agizüker, ta Bodhbarnü Chakhesang Public Organisation (CPO) sangdong ka ajanga ashi.

Employment policy tsütsü ajak sako, ochishia aser tajungtiba inyaksü asoshi ibai mera tajung ka lir, ta ashi.

Employment nung ajak kasa masüba bentettsü asoshi sorkari

inyakba pela agizüker, kong advanced tribes pur maneni resources, education aser sorkar mapa nung jenjang tajungba lir aser backward tribes tem lenla balala nung timtem jenti ajurur, ta CPO sangdong ajanga ashi.

Personnel Information Management System (PIMS) aser Census data athishia parnoki advanced aser backward tribes tsünga employment tsütsü tepila kanga aliba indang tuteta ashi aser policy yanglushiba mapang

backward tribes tejangraba wakzüka ayutsü sorkar dang ajungshia liasü.

Kasa mapang parnoki tejangja takotet nisungtem aliba statutory commission ka tentetabalaka inyaksangshidaksütsü ajungshia liasü.

"State nung tang loktiliba aser rongsenketzüng jenjang asangsang nung asadanga tang aliba policy kanga junga iba commission yagi asadangtsüla," ta CPO ajanga ashi.

Longsa Mongka kini lenir Metsübo Jamir nem chuba ak sütsü

Mokokchung, 13 Aug (TYO): Longsa Mongka kin-i lenir Metsübo Jamir, Rural Development & SIRD, Govt. of Nagaland nem chuba ak sütsüba sentong ka Aug 13 nü Longsa yimdak agiogo. Iba sentong nung akhi asen tsürabur yimya ki maka sobaliba ken tenyutepba den süngo den shitu mayonga longsolep.

Kimak sentong temer külen anküp sentong nung Minister, Metsübo Jamiri jembidang, pa nem yimli tuluba agütsüba asoshi pelaba den iba ama sobaliba tajung asen tsüraburtemi benschia aruba ya maneni asen chirnurtemia benschia aotsü ajungshiteptsüla, iba ama sentong ajanga nüburtem tsünga telungjem adokdaksür aser lanurtemia otsüolem tali terajemba meteter, ta ashi.

"Asenoki asenok ya tangar kin künnüyonga mekümtettsü, kechiaser asenok ya kin tejangja ka aser asenok ya Mosem chirtem lir, anungji, asenoki tetsü tebou memelenshitettsü", ta pai ashi. Iba ama kin kidong lungjema aliba nung ya temoatsü aika sentaka lir, paisa shisem.

Paisa melenshidaksünüba olen ka ashidang, asen tetsü tebou konang nung dang ajemdaker asenok asüküma



Longsa Mongka kin-i lenir Rural Development & SIRD Minister, Govt. of Nagaland, Metsübo Jamir nem Longsa yimdak August 13 nü chuba ak sütsüba mapang tangokba noksa nung angur. Mokokchung, 13th August, 2025

melili, kechiaser iba konang jagi tanü asenok nem kecha bener marutsütsü, anungji, tesüiba konang dak dang merangloki mapa meranga inyakba den asen tsüraburtemi inyakba dang nungi tuluba asenoki inyaksü merangtsüla, ta ayongzü.

Kaket shisashibajia bushitsü tim, aji süaka, shisatsü bushiba den külemi mapa meranga inyaker adoktsüla, kechiaser meranga inyakbaji kecha dena medemdangtsü makok. Tanü yim aika nung yim toktsür bendangleni senshimaba ajanga yim apua kümdaksür, anungji, pei taso yim meima aser alu meranga yima tepok sünga

jangratema alitsü merangang, ta paisa ajungshia liasü.

Tanü asenok ajurutepba ya otsü tasen ka yanglur asütsü, anungji, tanü nungi tenzüka asenok tali teputepba nung kadi ka yariba den yimer, Aor aser Naga nunger rangben asoshi inyaksü tangatetba alitsü asoshi paisa ayongzü.

Iba sentong nung Noklenrenba menden liasü. Anküp o Mongka kin nungi - Imsutoshi Tatar, Imtipokyim GB, Aoshingang Jamir, Aochuba parnoki o tsütsü jembia aser Metsübo Kin meyonga Rongsenmongba Tatar-i shilem agia liasü.

Dimapur, Niuland aser Chumoukedima DC-i metetdaksür

Dimapur, Luroi/August 13 (TYO): Dimpaur Deputy Commissioner-i, Dimpaur District kübok sorkar department balala nungi officer aser staff tem ajak dang August 15 nü DDSC Stadium nung amungsü aliba Independence Day sentong nung ajak compulsory adentsü metetdaksüogo.

Home Department-i tetuyuba agütsür aliba dak ajemdaker agütsüba tetuyuba nung attendance ya sentong tagidak nung agitsü koba anepdang 8:30 nung tenzüksü ta metetdaksüogo. Attendance agiba sülen list ya Deputy Commissioner indang office nung benöksüla.

Deputy Commissioner, Dr.

Tinojongshi Chang, NCS-i, iba sentong koda tongtibang iba indang lemsatepba den Heads of Departments (HODs) ajak dang iba tetuyuba sülen tashi anga anidaksü metetdaksüogo.

Ano, Home Department-i tetuyuba agütsüba dak ajemdaker Niuland Deputy Commissioner Sara S Jamir-i, Niuland district kübok Head of Department, Head of Office, officers aser staff ajak dang Independence Day amungba anogo mandatory attendance agitsü ta metetdaksüogo.

Department ajak atema attendance sheet ya rostrum nung agütsüba aser Avonou Kire SDO (Civil) Hq dang nungi meshitettsü.

Maneni HODs/ HoO ajak

dang attendance sheet ya sign sür SDO Civil nem tanaben agütsüba metetdaksüogo, koba maneni Home Department nem agütsüba.

Kasa mapang nung Chumoukedima DC Polan John-ia, Chumoukedima District kübok Department balala officer aser staff tem dang August 15 nü Samogooting Stadium, Chumoukedima nung 79buba Independence Day sentong nung shilem agitsü metetdaksüogo.

DC-isa, department ajak dang attendance sheet Addl. Deputy Commissioner (Hq) Chumoukedima nem agütsüba metetdaksüogo, koba maneni Home Department dangi abentsü.

Mon District Planning & Development Board senden menogo

Dimapur, Luroi/August 13 (TYO): August ita atema Mon District Planning & Development Board senden August 13 nü DC Conference Hall nung menogo.

Deputy Commissioner Mon aser Vice Chairman DPDB, Wennyei Konyak, NCS lenisüba nung iba senden amen aser pai DPDB mendenbuba pelashishia agizüka liasü.

Taoba senden minutes lepa reprangshiba sülen DC-i, Good Samaritan School, Phomching

Town, Holy Agenels School aser Holy Trinity School, Tizit nem grant-in-Aid agütsüba atema onük benoka liasü. Iba dak sendakba nung Sr. SDEO Rose Ngullie-i, School aser school ki indang metetdakja liasü. Onük kanga junga asadanga sensak asema sülen house-i iba ken o ya ketdangsürtem dangi abentsü telemteba agia liasü.

House-isa, Mon Administrative Headquarter Platinum Jubilee indang sensak

asem, koba taruba küm agitsü lir. Board-i district nung HoD tem ajak densemer committee ka tentettsü asoshi telemteba agia liasü.

Maneni senden nung taruba Independence Day takok ngua amungsü atema sensak asem. Iba mapang DC-i sorkar tenzüker ajak dang pei khuret tali angatettsü aser talisa outpost officer tem dang taruba Independence Day sentong nung shilem agitsü mepshia liasü.



NAGALAND HEALTH PROTECTION SOCIETY

CMHIS (EP) AGIR GOVERNMENT EMPLOYEES & PENSIONERS ATEMA TEMETETTSÜ !

Ajungben timtem mapang empanel süa maliba mozü kidang na anepaludakja ali asü ?

Government Notification No. HFW-45/B/6/CMHIS/2022 dated 28th March 2024 ajanga metetdaksüba ama, ano maneni CMHIS(EP) kübok na item ama timtem asoshibo Emergency Medical Reimbursement angutsü :

* Na ajungbena timtem adoka temang reprangtsüsa kümra,

MESÜRA

* Nü nungdakji empanel süa aliba mozü kidang mengura (State Medical Board nungi temelaba agitsü).

Koma asüngdangtsü :

* Nü meyong User ID/Password amshia yangi online nung asüngdangang <https://cmhis.nagaland.gov.in>

* Website nung Notification section nungi Emergency Claim Form agizükang.

* Senotsü endokba meyipa meshitsü atema nungdakba documents ajak den külemi form-ji jungjunga fill up ser agüjangma.

Jungjunga inyaka aotsü atema yangi reprangangma : <https://cmhis.nagaland.gov.in/category/user-manual>

Item ya metettsüla :

i. Iba teyari ya tekalen shia aliba teinyaktsü ajak jagi temsüa alir Government mapa nung inyaker aser Pensioners asoshi dang lir.

ii. Shiranger taküm tia aser documents agütsüba ajak jungjunga reprangdang külen NHPS aser State Medical Committee (SMC)-i telemteba agitsü.

Teyari aginür na ?

Yangi angati jembiang : 1800-202-3380

State kübok tesem balala nung Nasha Mukta Bharat Abhiyaan sentong agiogo



DIPR



Jubilee Memorial College Mokokchung

Dimapur, Luroi/August 13 (TYO): Department of Social Welfare, Dimpaur District aser GHSS Lengrijan na longjemer August 13 nü Nasha Mukta Bharat Abhiyaan (Drug-Free India Campaign) kübok awareness sentong ka ayongzüka agiogo.

Iba sentong ya Supervisor Kalivi Zhimomi lenisüba nung agi, koba Graduate Teacher Anungla Pongener-i sarasademer tenzüka liasü. Iba sülen Social Welfare Department, Dimapur District Programme Officer Keneikesangulie Zumou-i achaayanga temesepba mozü nungi pila aliba lokti ka yangertsü atema tenangzüktepba agia liasü.

Temesepba mozü achiba ajanga timtem bener arutsüba indang jembiba mapang ICRA

Prodigals Home Dimpaur nung Residential Counsellor T. Meren Jamir-i, "Say No to Drugs, Say Yes to Life" onük nung ajemdaker jembi liasü. Pai kaketshirtem dang taküm libaliro tajung shimtsü aser lokti nungi temesepba mozü achiba agintsü atema longjemer inyaktsü mepeshia liasü.

Paisa, lanurtem dang alima koleni aoer aji angatettsü aser sorkar mapa dak dang merangloki pei sempet arangtshetsü ajungshia liasü. Pai kaketshirtem dang temesepba mozü ajanga timtem bener arutsüba dak sendakba nung tangazüba agütsüba asoshi pei tsürapur, adianu aser medemertem den sensak asemtsü ajungshi. Temesepba mozü achirtem kija kümatokba indang jembiba mapang Jamir-i, iba ajanga nisung ka ajak nungi

piladaksür, ta ashi.

Iba sentong ya CDPO, Dimpaur (U), Limasangla-i tepela o jembi tembanga liasü. Lai kaketshirtem dang online ajanga tenangzüktepba agitsü mepeshia liasü,

Kasa mapang nung Directorate of Information and Public Relations (DIPR), Kohima nunga Nasha Mukta Bharat Abhiyan (NMBA) sentong ya tenangzüktepba ka agia August 13 nü conference hall, DIPR nung mungogo.

Deputy Director, Ruopfulenuo-i achaayanga tenangzüktepba agi aser temesepba mozü achiba ajanga timtem adaokdaksüba indang tangazükba agütsüba asoshi department bendanga agütsür aliba nenshia metetdaksü.

Iba sentong ya lokti aser talisa educational institution,

university aser school tem nem shilem agidaksütsü aser kasa mapang nung temesepba mozü achiba yimya süpaba agi kangshia alirtem jangjateta parnok counseling, treatment center, aser rehabilitation facility tem den sendakteptsüba nükjiding nung ayongzüka agir.

Iba sentong ya State-level NMBA, Social Welfare Department, Government of Nagaland tetuyuba nung Ministry of Social Justice and Empowerment, Government of India den sentaktepa ayongzüka agiogo. Kasa tenangzüktepba agiba sentong ya IPR district office tem nunga agiogo.

Maneni linük ajunga den jangyu medema District Administration Mokokchung tetuyuba dak ajemdaker Jubilee Memorial College

Mokokchung nunga Nasha Mukta Bharat Abhiyaan sentong ayongzüka agiogo.

Sentong nung JMC Counsellor Yimnayang Aier tongti o jembi liasü, shibai temesepba mozü achiba ajanga timtem bener arutsüba indang jembi aser ashiba agi, nisung aika media ajanga angazüka aser medemertem nongshiba aser ajanga temesepba mozü achir.

Pai kaketshirtem dang yimya tamajung nungi pila alitsü aser medemer tajung shimtsü ajungshiba den temesepba mozü dang ma ta ashibaji tarutsü tajung ka dang hai ta ashiba ama lir ta ashi. Iba sentong ya kaketshirtem aser staff tem temesepba mozü achiba nungi pila aliba India yangertsü atema nangzükteper tembanga liasü.

Taruba ita PM Modi US-i oa UNGA senden nung adentsü

New Delhi, Luroi/August 13 (Agencies): September ita nung Ato kilonser Narendra Modi-i United Nations General Assembly (UNGA) senden nung jembitsü.

80buba UNGA senden ya September 9 nü tenzüksü aser September 23 nungi September 29 tashi General Debate alitsü.

September 23 nü US Tir, Donald Trump-i jembitsü aser September 26 nü Ato kilonser, Narendra Mod-i jembitsü. Kasa anogo nungjisa Israel, China, Pakistan aser Bangladesh linüktem nungi tekolakpurtemi jembitsü.

Taküm February ita nung Modi US-i oa Washington DC nung Trump den senden mena liasü. Senden tembangba sülen Modi aser Trump nati külem sangdong ka ajanga linük anaprongla tajangzük angutsüsa Bilateral Trade Agreement (BTA) tezüngzüktep agitsü metetdakja liasü.

Taküm küm tatembanglen US aser India na tsüngda BTA tezüngzüktep agitsü atema jembiba mapang nung tawa Trump-i India nunger osettsüset nung saru shilem 50 tuogo.

India-i Russia nunger totzü aliba anema Trump-i India

nunger osettsüset nung saru shilem 25 atu, aser taoba hopta nung ano saru shilem 25 tusemogo.

BTA tezüngzüktep atema jembitsü asoshi August 25 nü US nungi team kati India semdangtsü. BTA atema mezüngbuba shilemji October-November nungbosa tembangtsü nükjidong nung linük anapronglai inyakdar.

Israel aser Hamas tsüngda rara, Ukraine-Russia rara aser alima tesem balala nung rara aliba mapang ka nung UNGA senden ya amentsü.

Donald Trump-i, pa tang agi tanabenbuba Tir akümba sülen mezüngbuba ita trok nung pai rara aika anendaktsüogo, ta jembir.

Trump-i, pa ajanga Armenia aser Azerbaijan tsüngda rara anen, Cambodia aser Thailand na tsüngda, Israel aser Iran na tsüngda rara, Rwanda aser Democratic Republic of Congo na tsüngda rara, Egypt aser Ethiopia aser Serbia-Kosovo rara anendaktsü, ta jembir.

Donald Trump-isa, pai tiyongtsüi ia jembiba ajanga India aser Pakistan na tsüngda rara anena liasü, ta aiben jembiba arudar.

China Foreign Minister Yi-i India semdangtsü

New Delhi, August 13 (Agencies): Taruba Hombarnü China foreign minister Wang Yi-i India semdangtsü aser India National Security Adviser, Ajit Doval den senden amentsü.

India aser China nati linük ana tsüngda tesendaktep tajungba akümtsü atema tesüiba ita ishika lenirtemi inyaksangshia arudar.

Foreign Minister Yi aser Doval nati arrtsü dak sendakba onüktem nung o lemteptsü.

Tan ita tatembanglen Tianjin, China nung ayongzükba Shanghai Cooperation Organisation (SCO) summit nung Ato kilonser Narendra Modi aser China Tir, Xi Jinping nata jurila senden amentsü imlar.

Hokolbarnü China yimtiba, Beijing nung osangbenertem den jembidang China foreign ministry otongdar, Guo Jiakun-i SCO Tianjin Summit nung adentsü atema China-i Ato kilonser Modi pelashishia jaoker, ta metetdakja liasü.

Tamalen India aser China nati arrtsülen friction points nungi sepaitem aienshitsu aser Line of Actual Control (LAC) kübok Depsang Plains aser Demchok areas nung patrolling tenzüksü bangjema liasü. Ajioda linük ana arrtsülen tensa tajungba kümogo.

India aser China nati küm pongu sülen tang asentenshir tourist visas agütsü tenzükoogo aser shishilembaba tsütsü tesendaktep-a tajungba kümdar.



New Delhi, August 13, 2025: Singapore Deputy Prime Minister, Gan Kim Yong (abelen nungi tanabuba) 3buba India-Singapore Ministerial Roundtable (ISMR) senden nung adentsü atema New Delhi tonga aruba sülen tangokba noksa nung angur.

Asürtem den külemi süngo ajemtsü maongka angu: Rahul Gandhi

New Delhi, August 13 (Agencies): Opposition INDIA teloktep nungi MP temi Election Commission-i Bihar nung electoral roll atema benokba SIR anema longkak aitba mapang nung Bodhbarnü Lok Sabha nung Opposition lenir, Rahul Gandhi-i draft voter list nung 'süadokogo' ta sangdongba nisung kar den külemi tangokba video ka lemsatep.

Rahul Gandhi-i X ajanga, "Taküm nung jangratemtsü aika ajangshir, ajisüaka asürtem den külemi süngo ajemtsüsabo ni maongka

kodanga mengui liasü," ta metetdaktsü.

Paisa Election Commission aija, "Iba ama maongka ajangshidaktsüba atema nenok dang pelar, Election Commission!" ta metetdaktsü.

Bihar nung SIR exercise agiba sülen August 1 n Election Commission-i draft voter list sangdonga liasü.

Bihar draft roll atema voters crore 7.24-i July 25 tashi nung enumeration forms agüja liasü, aser draft roll nung voters lakh 65.6 agi tajemba lir.

Voters lakh 65.6 züngdokba nungjagi voters lakh 22

asürtem lir, voters lakh 36 mali mesüra kong aliar mejangja aser voters lakh 7 bo tesem ka dak tali nung tenüng agüja alirtem aser enumeration forms magütsürtem lir.

Bihar nung SIR ya voters züngdoktsü atema Election Commission-i benok, ta shia opposition-i Parliament House anaprongla nung longkak aita arudar.

August 17 nungi tenzüka Congress lenir Rahul Gandhi den Bihar nung INDIA teloktep nungi lenirtemi SIR anema state tesem ajaklen 'Vote Adhikar Yatra' agitsü.

Pakistan-i India dang IWT kübok tzü chiokang ta mepishir

New Delhi, August 13 (Agencies): Pakistan-i nuclear hadir agi India amokmerenba den külemi ano külenbo parnoki India dang tzü chiokang ta mepishir.

Pakistan army tongti, Asim Munir den Bilawal Bhutto densema yimtenren lenirtemi nuclear hadir agi India amokmerener, ano külenbo parnoki India dang Indus water treaty (IWT) kübok tzü chiokang ta mepishir.

Ajisüaka India-i, kiralongra

aser ken o jembiba na külemi aotsü makok; amokmeren aser tezüngzüktep na külemi aotsü makok, ta ashir.

"Onoki India dang tangsa Indus Waters Treaty kübok tzü agüjang ta mepishir aser iba tezüngzüktep shidak benshitsü mepishir," ta Pakistan Foreign Office-i X ajanga metetdaktsü.

Taküm April ita nung Pakistan nungi kiralongrartemi Jammu & Kashmir kübok Pahalgam nung raliwalir 26 khasetba sülen May ita nung India-i Indus Water Treaty tezüngzüktep agiena liasü.

August 8 nü Court of Arbitration Ayub Khan nati iba indang obendang

nung ajemdaker Pakistan foreign office-i, tzü menokdangi Pakistan dangi tzü yoktsü atema obendang agütsüogo, ta metetdaktsü.

Indus Water Treaty tezüngzüktep kübok aüdoklen aliba ayong asem- Ravi, Beas aser Sutlej ayong tzüji India agitsü aser anüolen aliba ayong asem- Indus, Jhelum aser Chenab tzüji Pakistan agitsü lemteta lir.

World Bank-i ketdangsüa 1960 küm September 19 nü Karachi nung Indus Waters Treaty tezüngzüktep ya agia liasü. Taoba mapang India Ato kilonser Jawaharlal Nehru aser taoba mapang Pakistan Tir Ayub Khan nati iba tezüngzüktep nung sign asü.



August 13, 2025 nü Varanasi yimti nung kaketshirtemi 'Tiranga Yatra' nung shilem agiba noksa nung angur.



PUBLIC DANG SANGDONGER

Bank of Baroda, Circular Road, Dimapur, Nagaland-i **Dr. Sukhato A Sema** tenüng nung tsünglanglen shia aliba kiojen ya customer ka credit/loan facility atema security ama agizüksü tebilemba lir, ta public dang sangdonger.

Nisung kari dangi metetdakja aliba kiojen ya parnok meyong/temeden lir ta süra anogo 10 tsüngda kuli tejangja bener Bank matsügdangi arutsü metetdaktsü.

Anogo 10 tsüngda telangzüba kecha melira iba kiojenji kecha tashishitsü mali, ta züngshia Bank-i mortgage asütsü atema inyaksangshitsü.

Kiojen osang tejangja:

Ali tasazük 3744 Sq.Ft. (00B-1K-06L) Patta No. 31, Dag No. 296 & 656, Block No. 3, Mauza No. 1, Khermahal, Dimapur, Nagaland. **North tsütsülen:** Gari lenmang, **East tsütsülen:** Yanthan'er li, **South tsütsülen:** Dr. Tarep'er li, **West tsütsülen:** Angami li tangbo Sema li.

Sd/- (Trilochan Sahoo)
Chief Manager
Mob- 9366501739
Date: 14-08-2025

Sd/- (Haihangrang E H Newme)
Empanelled Advocate
Mob- 9402237781



TIR YIMYIM YIMOBILEM (EDITORIAL)

DIMAPUR THURSDAY, AUGUST (LUROI) 14, 2025

Nüchiso shibai agütsütsü ?

Asenok Naga nungertem küm noklang junga yimten nüchiso bushir saka mangur aser mangubajibo yutsür nüchiso ya shiba dang asüngdangtsü aser shibai agütsütsüar mejangjaika kuma odagi. Iba ama terata tia ka nung tanü asenok Naga yimten nüchiso sangdongba anogo amonger. Atangji, 1929 küm Naga nungertemi British India government dang Naga nungertembo parnoki mulongba yimten yimli nung alitsüsa toktsür oang ta ashiba anogo nungi tenzüka Naga National Council-i 1947 küm August 14 nü Naga nungur yimten nüchiso nguogo ta sangdongba anogo tashi nung, Naga nungur asoshi India yimten temzüng kübok alitsüba bender yimten talenba nung alir asütsü ta tangatetba tulu nung tashiyim agi masü saka tangatetba aser yimten temeten onük jembia Naga yimten nüchiso asoshi jembiba aser inyakba angur. Item tsürabur aser Naga nungur lenirtemji tanüa taküm lilasang parnokibo Naga yimten nüchiso jenjang tajungba ka alangteter lia lila ta bilemer. Ajisüaka, 1947 küm India yimten nüchiso anguba sülenbo Naga nungur yimten lenirtem nem Naga nungur yimten temeten ken o ashitsü mapang junga magütsü tashiyim amshitsü tenzü. Ajisüaka, Naga nungertemi tangatetba tulu nung “ Naga nungurbo India kübok melii Naga yimten balaka lateta akümtsü temulungtetba sayua 1951 küm May 16 nü Plebiscite agiba otsü tanü asenoki kanga süoki ia jembir. Tanü ama Naga nungur o Naga nungertem na ta ajakbo junga memetetep aser tesem ka nungi kati oa nübortem ajurua jajatsüba gari lenmangbo yutsür tetsüng lenmanga junga maliba mapang ka, Naga National Council lenirtemi Plebiscite agitsü osettem tekolak nung bener tetsüng agi Naga nungur yimtsüng sema jajabaji pei tetsü taso lima yimten nüchiso asoshi taküm ajak bendanga agüja inyakba mapatem asütsü. Atangji, temeten aliba agi temulungtetba aser tangatetba tulu nung anibelem arema tasüa majem inyakba agi dang ashi, UN ama yimten sabang tejangja ka nungi danga Naga nungur Plebiscite agibaji kuli asütsü pur shinga maden ser aginungji, asenokbo kanga belem saka alimaibo aji memetet ta tanü tashi asenok 1951 Naga Plebiscite agiba mapa mekümteti timtem, takoksa aser telemsa-ang jenti adoka tensa mapang tamajung aika ajurua arudagi. Naga nungur yimten nüchiso bushiba otsü nung 1950s mapang yasa tamajungba liasü. Iba mapang nung India sepaitemi Naga nungur yim rongdoktsüba, aser yimtaklirtem ajak aremi jena orr yimtak sannüker kija dang lia khaseta yutsüba, yimtsüng ana asem külemi anidena yimtsüng ka nung septepa yutsüba, Naga nungur tetsür aser tebur putena yur meinyaktsü inyaka reshikangshiba aser Naga nungur Naga nungur kangshidaksüba mapatem tanü yimten yimsüsür aser lanurtemi bilemtetla sang, tang amaibo India sen raktepba agi Naga nungur rongnung telemsa madokla. Tanübo tamalen Naga nungur linük tenzükertemi taküm tenla agüja Naga yimten asoshi raraba tenlatem ajak amadoker, asenok ya Naga yimten nüchiso bushir masü saka alima rongsen bushirtem kümogo. Ajisüaka, item ajaki amajok lir, kechiyong alima rongsen bushia takar akümtsü asoshiibo telong nung timtema alitsü menügdaker, kechiyong linük nüchiso melen anguba rongsenji temoatsü masü, anungji senmang kuma maotsü. Iba jagi pei taküm dang masü saka semchirsemnur tashi topur mejungdaksütsü. Aji oda, yimten nüchiso masü rongsen bushiba agi, asenok rongnung meputep aser temulung melemtep tali adoka telemsa adokba manener. Joko, asenok Naga yimten nüchiso bushiba tenüng nung pei agitsü rongsen bushia bushia yimten nüchiso ya shibai agütsütsüar mejangjatetika kümogo. Aji oda, akhidangbo Naga yimten nüchiso tebilemtsü onük ya India den jembia aru, saka tanübo India den masü saka Naga nungur o Naga nungur na tama Naga yimten jenjang ka latetmatsüsa kümogo. Tejashitsüka, Naga nungur yimten nüchiso bushia bushia nüchiba-nüchiba akümer masü saka tali tali yiarba-yiarba akümer. Yiar nem kodaser nüchiso agütsütsü ? Nüchiso angutsü purtemji nüchi asütsüla. Tanü ama Naga yimten nüchiso sangdongba anogo bilemteta amongdang, asenok nüchi kuma shia arudakjang ta sarasadema mongdi !

OLEMSABANG

Khristan kibong kaji tesendaktep tajung akaba kibong asütsüla

~ L. Kika Pongener

Alima nung tenteta aliba loktiliba ajak ajungtsü asoshi kibong ya kangasa tongtipang lir. Kibong ka jungra yimden, arogo aser loktiliba ajakji pa sasa junga-atoktsü. Anungji ni kü tangatetba yari iba ocet ajanga kibong indang lesson kar lemsatepnur. Kibong ya Tsüngremi Eden-tsüki nung Adam o Eve na ajanga tenzü. Kibong ya mimchir mulongba agi tenzüka masü, saka Tsüngremi pa sasa pa sentong nung tenzü. Tsüngremi pai yangluba ajak kanga junger ta temulong sua reprang, saka nisung yangluba nung pai temulung masü. Tsüngremi nisungji kija alitsü majung ta reprangtet, anungji pai teyarir tetemsu ka yanglutsü mulongtet. “Kibuba Tsüngremi ashi...Nisungji kija alitsü majung; ni pa asoshi teyarir tetemsu ka yangludi. Aser Tsüngremi Adam sumanga mejangdaksür pa dak nungi tesaret ka agiteter, iba tesaret jagi ‘Tetsür’ ka yanglu aser Adam dangi anir ao....Anungji nisungi pei tebu aser tetsü toktsür pei kinungtsü den sentepa alitsü, aser tena shi ka dang alitsü” (Lipok-2:18-24). Yamaji Tsüngremi Eden-tsüki nung Adam o Eva na ajanga kibongji tenzü. Anungji kibongji lenla ajak nung sutep-sutepa tesentaktep tajung akaba kibong ka asütsü kanga dang tongtipang lir.

Tsürabur o chirnur tesendaktep : Khristan kibong ka Tsüngremi mulongba ama alitsü asoshi tsürabur o chirnur tsüngda tesendaktep tajung alitsüla. Chirnurtemi tsürabur dang akümtsüba tashi angatsüla aser tsüraburtem-ia chirnur dang meima bentshitsüla. Tsüngrem o-i ashir, “Tanürtem Kibuba nung nenoki pei tsürabur dang tashi angang, kechiyong aji tim” (Efesa-6:1). Tanürtemi tsürabur dang akümtsüba tashi angatsüba tenangzüka aketba mezüng ozüng lir (Efesa-6:3). Anungji tanürtemi pei tsürabur dang tashi angatsüba anganura angatsü, mesura manganura mangatsü ta masü....Kechisudir suaka angatsüba Tsüngrem’er ozüng lir. “Tebutem nenoki pei chirtem jashia ain tatokdaksü; Saka Kibubai sayuba aser ajungshiba nung mesutetang” (Efesa-6:4). Tanü Khristan kibong aika nung tsürabur o chirnur na tsüngda tesendaktep tajung maliba agi, kibong aika petsa-pronga dang aliba angur. Jabasoi tebu den indang-indanga mejembitetba aser jalai tetsü den indang-indanga mejembitetba kibong aika lir. Tanü Khristan kibong aika nung chirnur karbo mozular (Drug Addicted) aser Yi-lar (Alcohol addicted) asüba agi, tsürabur-iang drug aser yi alia chidakja/jemdakja room telung nung miima shibanga yur mesuba-a lir. Tanü Scientific Technology agi bener aruba sangrasangji mapatem....Mobile Phone, WhatsApp, YouTube, Video Games, etc. iba amala mashiyimi amshiba ajanga kibongtem nung tsürabur o chirnur na tsüngda tesendaktep piladaksüba kibong aika nung angur. Kibong aika khristan kibong memesuki ‘Hotel’ amai dang pei pei mapang nung arua chiyungli oadokli ta asüba angur. Kibong nung tsürabur anaprongla sen/rongsen bushidang chirnur nem mapang peria magütsüba ajanga chirnur karbo jungnuseta taküm tia raksadaksüba angur.

Apuani tsüngda tesendaktep : Khristan kibong ka nung sunepa, junga alitsü atema apuani tsüngda tesendaktep junga alitsüla. Kinungtsürtemi pei kinungbur dang akümtsüba bentshitsüla aser kinungburtem-ia pei kinungtsür dang meima bentshitsüla. Tsüngrem o-i ashir, “Kinungtsürtem, nenok kinungbur kari Tsüngrem o tashi manga-aka, ajisuaka, pei kinungtsür jaklaliro tajung agi, oda nenok akümtsüba aser temeruk jaklaliro ngua, aji agi Tsüngrem o medeni parnok ajangzüktetsü asoshi pei kinungbur küpok liang” (1Peter-3:1-2). Tanü kinungtsür aika TV nung Sereal addicted kümadoker, pei kinungbur aser chirnur kong lir (?) Kidangi chirnur aru asü maru (?) Kecha memeteti senzuka toktsüba aser pei kibong teinyaktsü mapa senzuka toktsüba kinungtsür aika lir. Kinungbur aika Yi-lar kümadoker pei kinungtsür aser pei kibong sentokba kinungbur aika lir. “Kinungburtem, nenok kinungtsür nenok dang nungi tashi maitba po aser taküm taochi senmang semtepertem ta meteta, nenok sarasadem menokdangtsü asoshi; shisatsü amato nenoki pei kinungtsür dang akümtsüba parnok den liang” (1Peter-3:7). Tanü Khristan kibong aika nung apuani tsüngda temeim mekonga kümer, kibong karbo balatsüsa akümba-a angur. Kibong aika nung kinungbu o kinungtsü na sentong balala aser kinungtsü kechi inyaker kinungbui memetet, kinungbu kolen senzür kinungtsü memetet, pei pei dang litepba kibong aika angur. Terasatsüka, kibong aika kinungtsü o kinungbu na senbong balala asüba agi sentsüh agi tsühbanger tangar nem ki shibangdaksüba aser talidak memetetdaksü atükshia jenshia senzüba temeimtsü kibong karbo lir.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Chhattisgarh nung Khristan Hospital ka anema bushisüngdang



Raipur, Luroi/August 13, 2025 (Agencies): Bajrang Dal, Vishva Hindu Parishad (VHP) aser tanga Hindutva organisations-i tashishiba ken o ka agütsüba sülen Chhattisgarh state nung Dhamtari district administration-i küm 115 tejen Khristan hospital ka anema bushisüngdangtsü tuyuogo.

Dhamtari District nung aliba Bathena Christian Hospital nung ketdangsertemi medical service shidak magütsür aser hospital indang nursing college kangshia Khristan yimsü dangi meyipdaksür, ta Hindu organization-i tai tongloksü.

Khristan hospital ya 1910 küm American Mennonite missionary temi amenoka liasü aser iba hospital ya Chhattisgarh nung hospital tejentiba lir.

Mezüngbo iba hospital ya Mennonite Medical Board indang unit ka liasü aser yipten 250 aliba hospital nungji Dhamtari, Balod, Raipur, Rajnandgaon, Kanker, Bastar, Durg, Kondagaon, Dantewada aser Gariaband district tem den külemi kidanger state Odisha nungia shirangertem yaria arur.

1918-1920 küm Spanish Flu wara mapang nung iba hospital nung medical resource tera dang liaka shiranger aika yaria aruogo. Iba hospital ya tang tashi American Mennonite den tesendaktep liaka tangbo parnok sasa dang achaayanger.

July 27, 2025 nü Hindu organization balala nungi züngsemtemi iba hospital anema longkak aitdang osettsüset aika raksatsü aser doctor tem-a amokmerena liasü. Iba hospital anema inyakyonga tang tashi aibelenertem anema kecha meinyaker, ajisüaka district ketdangertemi iba hospital anema dang bushisüngdang tenzükogo.

Iba hospital nung jenjang kanga dalang agi medical teyari agütsür, ajisüaka joko tesüiba ita ishika Hindu organization balala iba hospital anema inyaker.

Taküm June 28 nüa VHP züngsemtemi tashiyim amshia hospital telungi aiba sülen ghonda asem shi timtem agüja liasü. Parnoki wako songa ayu, hospital atem nung nashiscü mezütsü, wheelchair aser CCTV camera aika raksaja liasü.

Hospital ketdangsertemi police nem ken o agütsüogo ajisüaka ketdangsertemi tang tashi aibelenertem anema kecha meinyaker.

Osangbenertem den jembidang Chief Medical Officer, Uttam Kaushik-i, "VHP, Bajrang Dal aser tanga teloktemi tashishiba ken o agütsüba sülen iba hospital anema bushisüngdang tenzükogo. Medical service shidak magütsür ta tai tongloksüba den külemi iba hospital nung tangartem Khristan yimsü dangi meyipdaksür, ta tai tongloksüba agi bushisüngdangba nungji district administration nungi ketdangsertemia shilem agir," ta ashi.

VHP lenir, Ramchandra Devangan-i, "Iba hospital indang nursing college nung tangartem Khristan yimsü dangi meyipdaksür. Student tem dang Khristan yimsü dangi meyiptsü rongshir aser sarasademtsü atema kangshia Tenla kidangi anir aoer," ta metetdaksü.

Paisa, Hindu tsür nursing student tem dang Khristantem den kibong akümtsü ajungshir, ta metetdaksü.

Ajisüaka Hospital Medical Superintendent, Sandeep Kumar Patonda-ibo, "Iba hospital lapokba sülen küm 100 dak tali jungogo aser shirangertem shinga mebendangi kasa züngshir. Nursing college nung yimsü dak sendakba kecha mebenshir mesüra yimsü memeyipdaksür," ta metetdaksü.

Dr Patonda-isa, "Shirangertem mesüra parnok kinüngertem shingaia hospital anema tashishiba agüja mali. Medical teyari shidak magütsür mesüra tanga onüktem nung tai tongloksübaji onoki media mesüra tanga organisations nungi dang angashi," ta ashi.

VHP-i health ministry aser administration nem takhangba onük 8 agütsüogo, aser item takhangbatem rongnung, aibelener doctor tem anema nisung tepsetba mesüra ashikülakba ken o benoktsü, medical licences thinentsütsü,

takoksa angurtem nem senotsü teyari agütsütsü, hospital shibangtsütsü aser nursing students nem shiranger meyaridaksütsü takhangbatem densema lir.

Item tashishiba ken o agizükba sülen State Health Minister Shyam Bihari Jaiswal-i district administration dang iba hospital anema bushisüngdangtsü atema tetuyuba agütsü.

Minister-i iba tetuyuba agütsüba ajanga Hindu teloktem ano tasü itshidaktsüogo.

Chhattisgarh chapter, Association of Healthcare Providers of India (AHPI) Tir, Dr Rakesh Gupta-ibo Hindu züngsemtemi iba hospital anema inyakbaji sashia aitsüogo.

Paisa, "Hospital nung osettsüset raksatsüba aser health workers amokmerenbaji tim masü; linük nüchiso mangudang nungi iba hospital-i kanga tezülen aliba tribal nisung jenti yaria aruogo," ta metetdaksü.

Dr Gupta-i, "Tesempa nung ajemdaker item ama mapa inyakbaji terenlok aliba loktiliba ka nung agizüktettsü makok," ta metetdaksü.

AHPI-i ketdangsertem dang iba hospital nung nursing staffs aser doctor temi tetsübu kecha makai shirangertem yaritsü asoshi security peria agüjang, ta takhangba agütsüogo.

Trump administration-i Africa nung Khristantem tepsetba anema inyaktsü

August 13, 2025: Africa tesem balala nung Khristantem jenti tepsetba anema inyaktsü atema White House-i tenangzükba agiogo.

Trump administration-i, Africa nung Khristantem jenti tepsetba nokdangtsü atema parnoki State Department den külemi inyakdar, ta metetdaksü.

July 27 nüa Democratic Republic of Congo (DRC) nung Khristantem tekülem sentong tagidak mapang nung Islamic kiralongrartemi Khristan 49 tepseta liasü.

Osangbener den jembidang White House otongdar kati, "Khristantem jenti tepsetba ya Trump administration-i sashia aitsür," ta metetdaksü.

US State Department nung

ANOGO ABEN TSÜNGREM DEN

Lenisüba tanela

"Ochi Tanelai nenok ajak ochiba dangi anitsü."
Yohan 16:13

Tanabuba tangatetba tanelaji, Tanela Temeshi Kibuba Yisui Tanela Temeshiji asenok Teyarir aser Lenir ta metetdaksü. Pai asenok ochiba dangi anitsü. (Yn. 16:13).

Tanela Temeshiji tamanger shia dak alir aser tzüra temdaksür. Kodang tesayuba Tsüngrem nungi mesülr idakji jangratem aser tipdem ka malitsü. Iba indang tenyar Yohani tejangja ashi. "Shirnoki nenok mashileni anisar, parnok indang ni item o nenok dangi züluogo. Pa nungi nenoki kechi mezüja shimtetba angu, aji nenok dak alinung, kari nenok dang sayutsü, aji nenok tenüngdaksü maka. Saka Pai mezüja shimtetba jagi kechisarena indang nenok dang sayu nung, aser aji ochi asünung, tiyazü masü, aser aji agi nenok dang koda sayu, aji oda nenok dak liang" (1 Yn. 2:26,27). Iba osang yagi arogo nung tamangertem aintsü sayuba indang mashir (Ef. 4:11-13). Saka arogo nung tiyazü tesayurtem, shirnoki na ashioktsütsü meranger parnok indang jembir.

Tanela Temeshi asenok nem tiyazü tesayuba anema tekümdangtsü agütsür (1 Tim. 4:1). Tamanger kari tiyazü tesayuba kar mesüra jungkai adokba kar Khristan telok nung amshitsü merangdir pai Tanela Temeshi jashidaktsüra! Pai "tatok makaba temenen" menar! Iba yagi Lucifer nem masadangtetba maongka agütsür. Tanela Temeshiji ochi tanela, anungji tiyazü tesayuba agi pa peladaksütsü makok.

Pauli 1 Tesalonikia 5:19-22 nung Tanela remsepdaksüba mapa asem sayur.

- 1) Sayutsüngiba mezüngmeshi masütsü
- 2) Ajak tendanger tajungba ametang
- 3) Tamajung kechisarena nung pilaa liang.

Tesalonika arogo nung Grik nunger süngyanglu külemba yimya tesayuba kar lir ta Pauli putet (Tesa. 3:5). Junga mangateti sayutsüngiba ajanga Asentenshi sayutsüngidang sayutsüngiri mezüngbuba onük nungji aibelener.

Metendangi agizükba aser tamajung nungi pilaa maliba jagi ajemaluba Tsüngrem Tanela tali jashidaktsüra, aser asenok dak aliba Tanelaji remsemdaksür, tangar tanelatem ajak sakdaksür. Tanela Temeshi-i ola matoki tangar tanelatem inyakba ajia dangbo malitsü. Pa tenük meyiba Tanela lir!

Tanela Temeshi arung, kechiaser Na ajanga ainkartemi zülu aser jembir, ochiji lapokang, Na sapi lir, Temeshi Kaketji lapokang! (Charles Wesley, 1707-1788).

AO OSHI ANGAZÜKDAK:**TANÜ ANGAZÜKTSÜBA OJANG****Teshima**

(v) temetetdaksü, tejembi ta ashiba (don't tell)

* Lanuba dang ni shiranger ta teshima.

Teshimak

(v) temulungjang aser tejak mepelatet akümba (gloomy)

* O tetsürok agi tejak teshimak kümdaksür.

OLONG PAITEP # 7239

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S__i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7238 TELANGZÜBA**TIPIEN :**

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among, 12. Miim,
13. Anem.

**ALOKBA ASER SOBANGBA CONSUMER TIMTEM LEMSATEPER**

Alokba : Consumers aser Yimdaklir ajak gas cylinder subsidy sen enoktsütsü, bank account zero-balance maintain sütettsü taser kangshia Bank Account lapokdaksü. Iba sülen account nung sen melira fine/senchi agi aser gas subsidy sen menoktsü tenzü. Gas jenjang joko merijang junga agi alir.

Sobangba : Modibar jang aser Modibar gas ta sensakertem pelaseta agir masü na?

Alokba : Aya, aji na, asenoki GST aser tax balala aika agutsüba nungi tera agitetta agutsürba dangaja. Aser ano Jio sim card angati aguja, angati jembidaksübatö langa joko sen aika agi recharge asür masü na? Danga company sim amshiti asünung adhaar link, bank account link, ration card link, aika süadoker memelentetter.

Sobangba : Haujato, junga mesüzükdatsüogo ni.

Alokba : Hai! Ano nah, prepaid meter angati enoktsüti ta mesüzüktsü merangba ya koda! Khenlirbo sen aika agi recharge asütsüsa akumtsü aser asenok consumertemi kecha meshitettsü.

Sobangba : Sürabang bazar nung shishilembaba ya koda?

Alokba : Ajia asenok consumertemisa telungnung alir tax enoker agutsür ati.

Sobangba : Oh, Alokba asenok consumertembo yaktabo jungtir!

Lilir - WhatsApp**Assam: Hojai nung police personnel tem aika yiru**

Assam nung Hojai district kübok Digholbali tesem nung Mongolbarnü nikongtsütsü local tem den mangatettep adokba sülen police personnel tem aika yiru.

Guwahati, Luroi/August 13**(Agencies):** Assam nung Hojai district kübok Digholbali

tesem nung Mongolbarnü nikongtsütsü local tem den mangatettep adokba sülen police personnel tem aika yiruogo, ta ketdangsürtemi metetdaksü.

Police-i ashiba agi, lenmang majungba aser ozüng alema gari tulutem senzügenpongba anema longkak aitsü asoshi iba tesem nung alirtem adenshir aliba asadangtsü asoshi team ka iba tesemi aoba sülen iba lendong ataloka liasü. Telok

ana tsüngda opangmepui mangatettep adokba sülen tensa mejungi küma liasü.

"Ajungbena parnoki police gari raksatsüba den ketdangsürtem dak azük tenzü. Parnokrongnung karibo onok sota ayutsü meranga liasü," ta police officer kati ashi.

Lokti senshidaksütsü atema police temi injang khatok tenzü aser süng amshia liasü. Iba lendong nung police gari trok aser motorcycle ka raksa liasü, ta Hojai Superintendent of Police Saurav Gupta-i ashiba den,

constable tem densema duty nung aliba police tem aika yirua liasü, ta shisem.

Ajisüaka local temi ashiba agi, parnok senden ka mena aliba mapang police temi ajungbena arua parnok minpronga liasü.

Ken o dak sendakba nung ozüng alema senden amenba aser on-duty ketdangsürtem dak teka sangshiba atema ken o ka benokogo. Police temi ashiba agi, ken o dak sendakba nung temulung melemi bilemertem aika jangjaogo aser karbo puatokogo.

BSF-i Meghalaya kübok Indo-Bangladesh arrtsü nung security akangshir**Shillong, Luroi/August 13**

(Agencies): Border Security Force (BSF) Meghalaya Frontier-i, Independence Day matong tsüngda security akangshitsü asoshi Meghalaya kübok Indo-Bangladesh arrtsü nung 'Operation Alert' amenokogo.

Iba meita aoba sentong ya August 10 nungi 16 tashi benoka inyaksü, koba surveillance akangshitsü aser state police aser tanga enforcement agency tem den longjemer arrtsü nung security tali akangshitsü nükjidong nung amenokogo.

Inyakyim takok ngua benoktsü atema BSF-i

tongtibang forward post temi sepai talila yokogo.

Inyakyim indang indanga achaaangtsü atema frontier aser Sector Headquarters nungi ketdangsür tejentem arrtsü leni ogo.

Iba meita aoba sentong nung area domination strategy akangshiba, 24/7 patrols senzüba, mimlai aliba tesemtem nung checkpoints amenokba aser ayonglen inyakyimtem meita ataba densema lir.

Ketdangsürtemi talisa nashi chang shibelenba, ozüng alema arrtsü adena senzüba aser tenokdangba agütsür aliba oset balala shibelenba nokdangtsü atema rangloker inyakdar.

Security forces temi ali lenmang aser ayong lenmang naprongla night vision gear amshia meita atadar aser lendong ataloktsü ana nung aliba tesemtem tanen makai meita atatsü atema mobile patrol units tem yokogo.

Inspector General O.P. Upadhyay, shiba tang arrtsü nung oa lir pai ashiba agi, 'Operation Alert' ajanga linük kümzüka toktsütsü aser talisa Independence Day amungtsü lia kecha timtem madokdaksütsü atema BSF maneni bendanga agütsür aliba sayur, ta ashi.

Iba meita aoba sentong ya August 16 tashi benoka inyaksü.

Mizoram nung ali kiburtemi longkak aittsü amokmeren**Aizawl, Luroi/August 13**

(Agencies): Mizoram nung Bairabi-Sairang railway line lapoktsü atatepba mapang iba lenmang nung ali kiburtemi pei ali nung atsü atsüa longkak aittsü amokmerenogo. Parnoki ashiba agi, parnok nem tang tashi ali temenok magütsü lir.

Mongolbarnü ali kiburtemi Aizawl nung osangbenertem den sensaksemba mapang, parnoki Ato Kilonser Narendra Modi, Union Railways Minister Ashwini Vaishnaw, Indian Railways, aser Aizawl Deputy Commissioner dangi parnok tebilemba lemsa-a shiti zülutsü sentong lir, ta ashi

Parnoki ashiba agi, alir kibur 14 nem railway lenmang yangluba mapang parnok ali raksatsüba atema tang tashi temenok sen crore 14.56 magütsü lir.

Ali kibur 14 rongnung pezü nembo senotsü kecha magütsü aser tanungba nem terara agütsüogo.

Iba telok yagi, sorkari temenok magütsüra parnoki pei ali nung atsü atsütsü ta amenokmerenogo.

Parnoki ashiba agi, Bairabi-Sairang railway line atema 2011 küm August 18 nü nungi asadang tenzü aser ali kibur timba nem 2016 küm tashi nung

temenok agütsüogo.

Ali kiburtemisa, senotsü magütsüba dak sendakba nung Aizawl district administration aser Indian Railways nati kati ka dak tai tongloksütepa arudar, ta ashi.

District ketdangsürtemi ashiba agi, parnoki ali kiburtem den senden ka menogo aser iba lenmang yangluba ajang kongshia aliba tesemtem August 19 nü asadangtsü telemtetba agiogo.

Ajisüaka ketdangsürtemisa, standard administrative procedures sülen anidakra temenok agütsütsü atema küm ana mesüra asem agitsü, ta ashi.

UK, France aser Germany linüktemi Iran merenshitsü renemer

Berlin, Luroi/August 13 (Agencies): August ita tatem tashinung Iran nuclear sentong indang jembishinü metenzükshira onoki Tehran nem temerenshi agütsütsü renema lir, ta UK, France aser Germany linük temi UN dang shiogo.

Linük asem dangya E3 ta ajar aser parnoki "snapback" mechanism ka benoktsü renema lir ta ashir - tetetzü Iran-i jembishinü metenzükshira taoba mapang temerenshi agüja aliba tanaben agütsüshitsü.

E3 ajanga ashiba agi, ken o jembishinü akatsü asoshi August ita tatem tashi atsülangogo, saka Iran nungi telangzüba kecha mali.

Iran nunger ozüng yanglur Manouchehr Mottaki-i ashiba agi, temerenshi tasen agütsüra par nuclear programme azüokba nuclear deal ka nungi ainshitsü Iran indang parliament renema lir, ta Iranian Defa Press news agency ajanga ashi.

Taoba ita Istanbul, Turkey nung E3 lenirtem aser Iranian diplomats tsüngta senden mena jembishinüba sülen parnoki iba shiti ya zülü.

UN dangi France foreign minister Jean-Noel Barrot, UK foreign minister David Lammy

aser Germany foreign minister Johann Wadephul nunger temi züluba shiti nung Iran-i par nuclear sentong azüoktsü memulunga temerenshi tulu agütsütsü ta ashi.

Iba ken o jembishinütsü asoshi mapang atsülangba nung Iran nungi telangzüba agüja mali, ta E3 ajanga ashi.

"August 2025 matemdang diplomatic solution kati arutsü Iran-i memulunga mesüra mapang atsülangba maongka magira, E3-i snapback mechanism amshitsü renema lir," ta shiti nung ashi.

Iran nem nuclear nok-nü mey angludaktsütsü mechi onoki "diplomatic tools" ajunga amshitsü renema lir ta ashi - saka Iran-i nuclear nok-nü yanglutsü tebilemba mali ta ashir.

Temerenshi agüja aliba agiena aser civilian nuclear programme temeden amshidaktsütsü mulunga maneni jembishinütsü renema lir, ta Iran-i taoba ita ashi.

E3, US, Russia aser China den Iran-i nuclear deal ka zülutebpa sülen taoba mapang Iran nuclear programme nung temerenshi agüja aliba 2015 küm agien aser iba mapang nuclear inyakyim tajemba

akumtsü aser international inspector tem par nuclear sites telungi aitdaktsütsü mulungtep. Iba deal ya October nung tembangtsü.

Tir Donald Trump mezüng kümsük mapang iba tezüngzüktep nungi 2018 küm US ainshi aser iba yagi Iran-i nuclear bomb yanglutsüba lenmang nung tenokdangba kanga ajema agütsür ta ashi.


Iba sülen Iran dak US sanctions ajunga tanaben benok.

Iran-i tayang kepzüka tenokdangba alema ao. May ita UN nuclear watchdog, International Atomic Energy Agency (IAEA) ajanga ashiba agi, Iran ket nung '60% purity enriched uranium' tuozük seret 400 dak tema lir - koba civilian mapa nung amshiba dang nungi kanga agi timba aser nok-nü yanglutsü anasa lir.

Israel aser US den mangatettep adokba sülen June ita Iran indang parliament-i IAEA den tesendaktep rakdang.

Kasai ta Israel-i Iran indang nuclear facilities maka anogo 12 rara tenzük. US-ia Iran indang nuclear sites kar nung bomb pokloktsü aser US-Iran jembishinü lia iba rara kanga kera tembang.

India nem ozü meyong tzüjang kata magütsütsü: Pakistan PM



Islamabad, Luroi/August 13 (Agencies): Pakistan meyong tzü tzüjang kata India nem magidaktsütsü, ta Pakistan Ato Kilonser Shehbaz Sharif-i Mongulbarnü shia kidanger linük ana tsüngta tensa tamajungba akumer.

1960 Indus Waters Treaty (IWT) khi mamshi ataba densema India-i Islamabad anema mera tesashi aika sangdongba sülen pai iba o ya ashi. Iba tzü nokdangtsü merangba ya "act of war" ama züngshitsü ta Pakistan-i tekumdangtsü shia arur.

"Tanü ni tsükchir dang ya shiner, nenoki ozü tzü soita ayutsü amokmerenra, ya temulung nung yuang - nenoki Pakistan indang tzüjang kata merakzüktettsü," ta Sharif-i sentong ka nung ashi. India-i

merangra, nenok tenarong metsüktsüsa ano lesson sayutsü ta pai ashi.

Anogo ka tejakdang taoba foreign minister Bilawal Bhutto-Zardari-ia IWT agienba ya Indus Valley Civilisation nung amakba lir ta ashi aser rara tenzüktsü tsüboa mali ta ashi.

Tampa, Florida nung aliba Pakistan nunger den jembidang, India-i tzü ayimba soitra Islamabad-i tzü nokdang raksatsütsü, ta Army Chief Asim Munir-i ashi.

"India-i tzü nokdang yangluba asenoki atatsü, aser parnoki aji yangludang, asenoki raksatsütsü," ta Munir-i ashi.

"Indus River ya India nunger kibong indang rongsen masü. India-i ayong soitsü sentong tem yangluba meyangu ama kumtsütsü asoshi asenok rongsen agi anüngaponga mali."

Pahalgam nung civilian 26 tepsetba tayang kepzüka India-i May 7 nü Operation Sindoor tenzüka Pakistan aser Pakistan-occupied Kashmir nung kiralongrar indang ki o jen raksatsü. Anogo pezü arütsü alema drone aser missile amshia maktepba sülen linük ana tsüngta May 10 nü tangatettep kati arua iba rara tembang.



सत्यमेव जयते

PROGRAMME FOR CELEBRATION OF 79th INDEPENDENCE DAY 2025

AT NAGALAND CIVIL SECRETARIAT PLAZA, KOHIMA



0600 hrs : Hoisting of National Flag in all Government Offices, Institutions/ Public & Private Buildings.

0850 hrs : Review of Parade by DGP, Nagaland.

0900 hrs :

- Hon'ble Chief Minister arrives, hoists the National Flag, takes Rashtriya Salute and inspects the Parade.
- Address by the Hon'ble Chief Minister.
- Presentation of Awards.
- March Past :

Parade Contingents:

a. 13 Assam Rifles Bn.	j. Home Guards & Civil Defence & SDRF
b. 78 th Bn. CRPF	k. 24 th Nagaland (1) Coy NCC Kohima
c. 105 Bn. BSF	l. 1 st Nagaland Girls Battalion Kohima
d. DEF, Kohima	m. Mezbur Higher Secondary School
e. 4 th NAP Bn	n. Don Bosco Higher Secondary School
f. 10 th NAP (IR) Bn.	o. 13 Assam Rifles Pipe Band
g. 15 th NAP (IR) Mahila Bn.	p. NPTS Brass Band
h. Mizoram Police Contingent	q. Nagaland Police 15 th NAP (IR) Mahila Pipe Band
i. Ex-Servicemen	r. Nagaland Police Auxiliary Brass Band

Parade Commander : **Shri S. Lanu Aier**, NPS
Dy. Commandant 10th NAP

Second-in-Command : **Kmr. Mhalezhunuo Chielie**, NPS
Asstt. Commandant, 8th NAP attached to Cyber Crime P.S., PHQ.

Performance by 13 Assam Rifles Pipe Band

Hostage Recovery Demonstration (Bus Intervention Scenario): NAP Rangers, Nagaland Police

Commissioning/Inauguration by the Hon'ble Chief Minister:

- Commissioning of Waste Collection & Transportation Vehicles to 20 (Twenty) ULBs under Swachh Bharat Kosh.
- Virtual Inauguration of Bio Fertilizer Production Units.

Entertainment:

- Patriotic Dance : "Operation Sindoor Anthem" (Women Resource Development)
- Songs : Imna Yaden, 1st NAP, Nagaland Police
i) "Vande Mataram" ii) "We Love Nagaland"

Cultural Presentation:

• Khamniungan Cultural Club Kohima	: (Khamniungan Tribe)
• Konyak Dancing Troupe Kohima	: (Konyak Tribe)
• Pochury Cultural Troupe	: (Pochury Tribe)
• Sangtam Women Cultural Troupe	: (Sangtam Tribe)
• Benreu Students Union Cultural Troupe	: (Zeliang Tribe)

1200 hrs : Visit of Institutions by Charitable Organizations

• Nagaland Contractors & Suppliers Union	: Bright Morning Star
• Puliebadze Club	: District TB & Chest Disease Hospital, Khuzama
• Lions Club	: Cherry Blossom, Lerie, Near CRPF Camp
• Royal Club	: Old Age Home
• Classic Club	: District Jail
• Rotary Club	: Cradle Ridge
• Nagaland Voluntary Women Organization	: Kohima Orphanage & Destitute Home
• Indian Red Cross Society, Kohima	: Leprosy Hospital, Nagabazar District Branch
• Kohima Chamber of Commerce & Industries	: Tabitha Enabling Academy
• Kohima Press Club	: State Mental Health Institute

Distribution of Sweets at the Parade Ground by Nagaland Motorcycle Club

Evening Programme at Nagaland Civil Secretariat Plaza

1500 hrs : Exhibition Football Match
DGP XI Vs MPL XI

1600 hrs : Prize Distribution

1630 hrs : Band Display

a. 13 Assam Rifles Pipe Band
b. NPTS Brass Band
c. Nagaland Police 15 th NAP (IR) Mahila Pipe Band
d. Nagaland Police Auxiliary Brass Band

Beating of Retreat

Rongsen, Rupreo & Chetri nunger Duleep Trophy asayatsü shimogo



Dimapur, Luroi/August 13 (TYO): Nagaland nungi cricket asayar Jonathan Rongsen, Sedezhalie Rupreo, aser Hem Bahadur Chetri nunger Duleep Trophy 2025-26 nung NorthEast Zone nungi asayatsü atema shimogo, koba Nagaland cricket asoshi nemadangsü mapang ka lir.

Iba den bendenloksema Mowalong Kichu, Team Physio asütsü shimogo.

Duleep Trophy ya 1961-62 küm tenzük aser iba ya India nung domestic first-class asayamung tongtibangtiba rongnung ka lir, kong linük kübok zone balala tokteper. Ajisüaka NorthEast Zone ya 2018-19 season nungiang züngoksema asayar.

Jonathan Rongsen ya asayar tejen ka lir aser pa lenisüba nung Northeast Zone asayatsü. Pa taküm agi asembenbuba Duleep Trophy nung asayatsü lir.

Kasa mapang nung Sedezhalie Rupreo ya sempet tajung aketba lanur asayar ka lir aser pa tang mezüngbuba NorthEast Zone nungi asayatsü lir. Hem Bahadur Chetri-a national jenjang nung tang mezüngbuba asayatsü atema renemdar.

2025-26 Duleep Trophy nung zonal teams trok asayatsü;

1. North Zone
2. South Zone
3. East Zone
4. West Zone
5. Central Zone
6. NorthEast Zone

Asayamung ya group-cum-knockout format nung asayatsü. Iba asayamung nung India nunger asayartem ajak pei zone nungi asayadaksütsü atema BCCI-i Zonal Convenor tem nem tetuyuba agütsüogo.

Iba dak sendakba nung Nagaland Cricket Association-i asayartem aser support staff nem tenüsang agütsüogo. Iba maongka ajangzüktetba atema Jonathan, Sedezhalie, Hem Bahadur, aser Mowalong nunger asoshi onok kanga nema adanger. Parnok shimba ajanga Nagaland aser Northeast nungi asayar tajung adokba sayur. NorthEast Zone team-i iba asayamung nung junga asayatetsü imlaja atar, ta NCA-isa metetdaksü.

Cincinnati Masters: Alcaraz, Nardi, Karen nungeri takok angu



Luroi/August 13, 2025 (Agencies): Tang asaya aliba Cincinnati Masters nung Carlos Alcaraz-i Hamad Medjedovic koka round pezübuba tongogo, ajisüaka Bodhbarnü Alexander Zverev aser Jessica Pegual na asayabo tzunglu kanga sashia aruba aser tsüngi aiba ajanga anentsüsa aküm.

Zverev aser Brandon Nakashima na asaya ya 6-4, 5-4 ta Zverev-i koka aliba mapang anen aser Pegula aser Magda Linette na asaya-a 7-6 (7/5), 6-3 nung anena liasü.

Alcaraz, shibai 6-4, 6-4 agi Serbia nunger asayar Medjedovic koka liasü, pai iba asaya akoba densema taküm asaya 50buba kokogo aser

Masters 1000 level nung asaya 13buba atonga kokogo.

Tebur kija asaya nung Ben Shelton aser Roberto Bautista Agut na asayabo tzunglu kanga sashia aruba ajanga masayateti liasü. Kasa mapang nung Karen Khachanov-i 6-3, 6-3 agi Jensen Brooksby kokogo.

Francisco Comesano aser Reilly Opelka na anogo tom nung asayaba mapang tzunglu aruba ajanga minute 45 tashi masayai liasü. Iba asaya ya Comesano-i 6-7 (4/7), 6-4, 7-5 agi kokogo.

Comesano taruba asaya Andrey Rublev den asayatsü, shibai Australia nunger asayar Alexei Popyrin 6-7 (5/7), 7-6

(7/5), 7-5 agi kokogo. 2022 küm Diego Schwartzman sülen Comesano ya Argentina nunger rongnungi Cincinnati nung round of 16 tonga asayaba mezüngbuba asayar kümogo.

Kasa asayamung tetsür kija asaya nung Dayana Yastremska masayatetsüsa akümba sülen Coco Gauff round pezübubai iogo. Arishi küm 21 tain America tsür la shibai taküm French Open kokogo aser 2023 küm Cincinnati aser US Open koker lir, la taruba round nung Latvia tsür Jelena Ostapenko mesüra Italy tsür Lucia Bronzetti den asayatsü. Yastremska ya shirangba ajanga masayateti liasü.

IOA-i CWG 2030 host asütsü atema India-i bid asüba aguizükogo

Luroi/August 13, 2025 (Agencies): Bodhbarnü New Delhi nung Special General Meeting (SGM) ka amenba mapang 2030 Commonwealth Games ayongzüka asayatsü atema India-i bid asüba Indian Olympic Association (IOA)-i formally agizükogo.

India-i 2030 küm CWG ayongzüka asayatsü atema tejangraba aliba lemsatepatokogo aser iba asayamung asayatsü asoshi Ahmedabad yimti benokdangogo. Ajisüaka India-i August 31 nü tatembangbuba anogo mesüitem tsüngda tatembangbuba bid benoktsüla.

Iba asayamung ayongzüka asayatsü janrartem rongnungi Canada atsüingnba sülen 2030

küm CWG ayongzüka asayatsü atema India jenjang tajungba kümogo.

Director of Games Darren Hall-i anir Commonwealth Sport nungi ketdangsürtem team kati tawa Ahmedabad semdanga venue tem asadangogo aser Gujarat sorkar ketdangsürtem den ajurutepa liasü.

Commonwealth Sport nungi lenirtem aikati iba ita tatemlen India semdangsü imlar.

General Assembly of Commonwealth Sport-i, November ita tatembangbuba hopta Glasgow nung senden amenba mapang host linük shimsü. India-i iba asayamung ya Delhi nung 2010 küm ayongzüka asayaogo.

Mon aser Niuland na Dr T Ao Trophy final asayatsü

Kohima, Luroi/August 13 (TYO): Tang asaya aliba Dr. T Ao Trophy 2025 - Inter District Football Championship nung Mon aser Niuland na final asayatsü. Iba asayamung ya Nagaland Football Association-i ayongzüka aser Kohima District Planning & Development Board-i host süa Indira Gandhi Stadium, Kohima nung asayadar.

Bodhbarnü mezüngbuba semifinal asaya nung Mon-i goal 3-0 agi Mokokchung madak takok ngua liasü.

Asaya nung Mon atema mezüngbuba goal ya Laiwang (7)-i minute 41buba nung D-box tepang nungi idakja Mon team tejakdang toktsü.

Asaya tanabuba shilem tenzüker minute asem majung tsüngda K. Arap (15)-i tanabuba goal idakja parnok jenjang kanga junga aküm

Iba sülen Amun-i minute 82buba nung Mon atema goal tasembuba idakja parnoki asaya ayong ayonga kokogo.

Tanabuba semifinal asaya nung Niuland-i host Kohima goal 3-2 agi kokogo.

Asaya nung mezüngbuba goal ya Toka (10)-i minute 37buba nung Niuland atema idaktsü. Iba sülen minute pongu dang lir Lokivi (19)-i ano Niuland atema tanabuba goal idakja parnok goal ana agi tejakdang aküm.

Asaya tanabuba shilem nung Niuland captain Kakhevi (7)-i minute 66buba nung Kohima defence ajanga ball kanga junga bener lur par team asoshi goal

tasembuba idakja liasü.

Goal asem chir liaka Kohima team-i tezü medangai maneni meranga asaya aser minute 72buba nung Kevizakie-i par team atema mezüngbuba goal idaktsü aser ano minute 89buba nung Nisede-i tanabuba goal idaktsü. Ajisüak parnoki goal tasembuba magütsüteti asaya tembang.

Bodhbar anepdang Kohima aser Wokha ya quarter final pezübuba metemjungi anenba minute 15 asaya, koba mapang apuloktsür asayaba mapang Kohima-i goal 2-1 agi koka liasü. Iba asaya ya August 12 nü asayatsü liasü, saka tsüngsang kanga majungba ajanga tema masayateti team anapronglai goal kaka idaktsür aliba mapang anen.

Wokha-i Mhabemo Kikon ajanga minute 20buba nung mezüngbuba goal idaktsü aser Kohima atema goal ka ya Kevizakie-i minute 71buba nung idakja liasü. Ajisüaka asaya atemtsü minute 15 anunga lia tsüngsang kanga mejungi akümba ajanga asaya anen aser Bodhbar anepdang asayatsü telemtetba agia liasü.

Bodhbarnü anepdang tanungba mapang asayaba mapang telok kati danga goal midaktsütet saka mapang apuloktsür asayaba mapang Kedolhuvo Naprantsu-i Kohima atema tanabuba goal idakja parnoki asaya akok.

Mon aser Niuland na final asaya ya Independence Day nü nikongtsütsü 4 ako nungi asayatsü.

BILEMDANGANG

"Tinyaktsü mapatem atemshia makazüi odang inyakdangtsüla."